

31 JUL 2002

LID-Tiba (Rangkuman)/I

LEBIH RAMAI PEMIMPIN TIBA UNTUK DIALOG PERKONGSIAN PINTAR

LANGKAWI, 31 Julai (Bernama) -- Cuaca cerah menyambut ketibaan pemimpin dan pegawai yang tiba di pulau peranginan lagenda bagi Dialog Antarabangsa Perkongsian Pintar Global 2002 yang bermula esok.

Walaupun cuaca mendung dan hujan diramalkan hari ini, matahari bersinar cerah sepanjang hari.

Perdana Menteri Mauritius Sir Aneerood Jugnauth yang ditemani isteri, Lady Sarojini merupakan pemimpin pertama yang tiba hari ini.

Pemimpin Mauritius pula merupakan ketua kerajaan kedua yang tiba untuk menyertai dialog yang bertujuan menjalin perkongsian pintar untuk kemajuan pembangunan dan kebajikan.

Pegawai tinggi yang pertama tiba ialah Menteri Kewangan dan Perancangan Pembangunan Botswana, Baledzi Gaolathe yang tiba semalam.

Timbalan presiden Afrika Selatan Jacob Zuma dan Presiden Namibia Dr Sam Nujoma juga tiba hari ini. Ini diikuti bekas presiden Botswana Sir Ketumile Masire.

Naib presiden Uganda Dr Specioza Wandira Kazibwe dan Perdana Menteri Lesotho Pakalitha Bethuel Mosisili dijadual tiba malam ini.

Presiden Paul Kagame dari Rwanda, Presiden Sudan Omar Hassan Ahmad Al-Bashir dan Presiden Zimbabwe Robert Mugabe pula dijangka tiba esok.

Global 2002 menggabungkan Dialog Antarabangsa Langkawi (LID), Dialog Antarabangsa Selatan Afrika (SAID) dan Dialog Antarabangsa Timur Afrika (EAID).

Dialog itu dijangka memberi tumpuan kepada keganasan, ekonomi global dan isu sosial.

Seramai 450 peserta dari 36 negara akan menghadiri dialog dwi-tahunan itu yang akan dirasmikan oleh Perdana Menteri Datuk Seri Dr Mahathir Mohamad di Pusat Pameran Antarabangsa Mahsuri, malam esok.

Dialog utama akan diadakan di khemah khas yang dibina di Pelangi Beach Resort di Pantai Chenang.

Terletak 8km dari Lapangan terbang Antarabangsa Langkawi, resort itu didirikan menggunakan konsep perkampungan Melayu dengan tetamu ditawarkan kediaman calet kayu setingkat dan dua tingkat.

-- BERNAMA

TM AZZ SHY TS LAT